

**Ilisimatusarnermut siunnersuisarneq ilisimatusarnermullu aningaasaliisarneq pillugit
Inatsisartut inatsisaat nr. xx, xx.**

pillugu

**Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap**

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap suliarinninnermini makkuninnga inuttaqarpoq:

Inatsisartunut ilaasortaq, siulittaasoq Randi Broberg, Partii Inuit
Inatsisartunut ilaasortaq, siulittaasup tullia Ruth Heilmann, Siumut
Inatsisartunut ilaasortaq, Per Berthelsen, Siumut
Inatsisartunut ilaasortaq, Mimi Karlsen, Inuit Ataqtigiit
Inatsisartunut ilaasortaq, Harald Bianco, Inuit Ataqtigiit

UKA13-mi ulloq 24. september 2013-mi siullermeerinerup kingorna siunnersuut
Kultureqarnermut, Ilinniartitaanermut, Ilisimatusarnermut Ilageeqarnermullu
Ataatsimiititaliap misissorpaa.

Siunnersuutip imarisaa

2012-ip naalernerani Kalaallit Nunaanni Ilisimatuussutsikkut Misissuinernut
Ataatsimiititaliarsuup (KVUG) atorunnaarsinneqarnera tunngavigalugu siunnersuutip
piareersarneqarnera aallartinneqarpoq.

Siunnersuut Kalaallit Nunaannut atuuttumik kalaallit ilisimatusarnikkut siuarsarneqarnissaat
nukittorsarneqarnissaallu pillugit kissaateqartoqarnera tunngavigalugu suliarineqarpoq.
Siunnersuut aqutigalugu Kalaallit Nunaanni ilisimatusarnermut siunnersuisoqatigiinnik
pilersitsinissaq tunngavilerneqarpoq, taanna aqutigalugu siunnersuummi anguniarneqartutut
taaneqartut piviusunnigortinnissaannut pingaarnertut sakkussatut isigineqarmat.

Siunnersuisoqatigiit pilersinneqarnerat aallaaveqarpoq ilisimatuussutsikkut misissuinernut
siunnersuisarnerit Kalaallit Nunaanni angerlarsimaffeqalernerat. Siusinnerusukkut suliasat

ataatsimoorullugit kalaallit qallunaallu akunnerminni Kalaallit Nunaanni Ilisimatuussutsikkut Misissuinernut Ataatsimiititaliarsuup suliarisartagaai, maanna una siunnersuut tunaartaralugu Siunnersuisoqatigiit suliassaat isumagineqartalissaaq.

Ilisimatusarnermut siunnersuisoqatigiit nunani tamalaani ilisimatuussutsikkut qaffasissumik pitsaassuseqartut, ilisimatusarnerup, nutaaliernerup aallartisaanerullu siuarsarnissaannut Naalakkersuisunut qitiusumik siunnersuisarnermik, iliuseqarnissamik aningaasaliisarnermillu annertuumik pisussaaffilerneqarlutik ingerlataqartunik pilersitsinissap periarfissinneqarnissaa siunnersuummi siunertarineqarpoq.

Inatsisartut siunnersuummik siullermeerinninnerat

Inatsisissatut siunnersuut partiini amerlanerussuteqarluartunik isumaqatigineqarluni tapersorneqarpoq.

Ataatsimiititaliap siunnersuummik suliarinninnera

Ataatsimiititaliap siunnersuummik suliarinninnermini annertunerusumik tigussaasumik eqqartugaqanngilaq.


Tusarniaanermut akissutit

Tusarniaanermi suliffeqarfiit susassaqarfiillu 30-nit ikinnerunngitsut tusarniaavigineqarsimapput, taakkunannga katillugit 11 inatsisissamut siunnersuummut akissuteqarlutik oqaaseqaateqarsimapput allannguutissatulluunniit siunnersuuteqarsimallutik. Siunnersuutip siullermeerneqarnerani apeqquserneqarpoq IMAK-ip ilanngullugu tusarniaavigineqarsimannginnera, tamanna pillugu Ilinniartitaanermut Naalakkersuisup ima akissuteqarfigaa, tusarniaanermi ilisimatuussutsikkut suliaqartut pingaarnertut tusarniaavigineqarnissaat pingaartinneqarsimammat.


Inassuteqaat

Siuliani oqaatigineqartut siunnersuummillu siullermeerinermi oqaaserineqartut tunngavigalugit siunnersuut **akuerineqassasoq ataatsimiititaliamit isumaqatigiittumit inassutigineqarpoq.**

Taama oqaaseqarluni ataatsimiititaliap siunnersuut aappassaaniigassanngortippaa.



Randi Broberg



Ruth Heilmann



Per Berthelsen



Mimi Karlsen



Harald Bianco